

HEADLINES (EVENING)

Date – 06/10/2024

Time - 18:30 Hrs

1. Nimin atang khan Aizawl leh Delhi inkara thlawhtheihna thlawk tlang 10 a awm ta.
2. Kumin thla 9 kal ta chung khan Mizoram Police leh Excise and Narcotics department hnathawkte chuan ruihhlo chi hrang hrang tam tham tak an man.
3. Chief Minister Pu Lalduhoma chuan Sairang leh Kawnpui inkar kawngpui a chhe zual te chu Nilaini ral hma ngeia hnawh mam hman turin thawktute a hrih.
4. Mumbai Chembur veng chenna in kangah chhungkaw pakhata mi 7 an thi.



DELHI DIRECT FLIGHTS

Nimin atang khan Aizawl leh Delhi inkara thlawhtheihna thlawk tlang 10 a awm ta a, Nilaini, Zirtawpni leh Pathianni-ah pheih chuan ni khatah vawi 2 thlawk a awm tawh dawn. Civil Aviation thuneitute hnen atanga Akashvani Aizawl-in thu a dawn danin tunhma chuan Indigo thlawhna Airbus 320 hi Lengpui tumhmun leh Delhi inkarah chawhkar khatah vawi 5 chauh 'direct flight' a awm thin a. Nimin khan direct flight dang pakhat chu chief minister Pu Lalduhoma'n a thlah liam nghe nghe a ni. Sorkar thuchhuahin a tarlan danin nimin khan Lengpui thlawhna tumhmunah Pu Lalduhoma'n IndiGo thlawhna Delhi leh Aizawl inkara thlawk thin a leta tihpun hawna hmanpui-in, thlawhna thlawk belh hmasa bera chuang tur passenger hnenah Boarding Pass a hlan a, Thlawhna a vai liam baw.

A hawna inkhawm tawi-ah hian Chief Minister chuan, Mizoram mipui mamawhna hriatpuia hetiang an neih theih na'na hma laksaktu sorkar laipui a Ministry of Civil Aviation leh IndiGo Airlines te chungah lawmthu a sawi a. Hei hian India ram laili leh Mizoram chu inpawhna nasa leh zualin a siam dawn a. Official-te chet velna atan te, sundawngte'n hma thar an lakna atan te, phai lam pan ngai damlo tan te, leh zirlaite tan te a tangkai em em dawn a ni a ti a. Mizoram ram mawi tak hi tlawhpawh awl leh zualin a siam ang a, khualzin tan tlawh pawh a awlsam leh zual dawn a ni, a ti. Mizoram sawrkarin civil aviation hmasawna lamah hma a la chho zel dawn tih tarlangin, Lengpui Tumhmun a tul anga tuaihnum chhoh zel a nih tur thu te, Mizoram hmun thenkhata Heliports din a nih tur thu te a sawi baw.

Hawna inkhawmah hian Pu R K Singh, Special Director, IndiGo pawhin thusawiin, he hmalakna hian India ram laili leh Mizote inkarah inunauna tha zawk, inpawhna nghet zawk a siam an beisei thu a sawi a. Mizoram sawrkar hmalaknaah an lawm thu a sawi baw a. Mizoram in thlai thar hralh tur a neih, Thlawhnaa phurh chhuah theih dan tur pawh an lo dap tur thu leh a hrana ruahmanna duan an lo tum tur thu a sawi a ni. He hunah hian Lok Sabha MP Pu Richard Vanlalhmangaiha, Pu H. Lalzirliana MLA, Chief Secretary Dr. Renu Sharma, Secretary to Chief Minister Pu Vanlaldina Fanai bakah Civil Aviation official pawimawh te, IndiGo Airlines thuneitute an tel a ni.



ASF

African Swine Fever (ASF) vawk pulhri leng mek chuan zia-awm lam a pan zel a, vawiin khan district 2-ah vawk thi 10 chauh report a awm. Vawiin khan Serchhip leh Hnahthial district-ah vawk 10 a thi a, heti hian kumin chhunga ASF vawk pulhri avanga vawk thi zat chu 13,808 a tling tawh a, vawk pulhri puan mekna khua hi 245 niin Vety department hotute chuan an sawi. Vawk pulhri darh zel tur venna atan vawiin khan district 3-ah vawk 30 suat a ni a, suat tamna ber chu vawk 11 an talhna Serchhip district a Chhuanthar Tlangnuam khua-ah a ni a. Kumina vawk pulhri avanga vawk suat zat chu 22,990 a tling tawh baw a ni.



## DRUG SEIZURE

Kumin thla 9 kal ta chhung, January leh September thla inkar chhung khan Mizoram Police leh Excise and Narcotics department hnathawkte chuan ruihhlo chi hrang hrang tam tham tak an man.

Thla kaw kalta chhung hian Police leh Excise & Narcotics department mite'n heroin an man belkhawm chu kg. 104 leh gram 266 zet a ni a. Methamphetamine hi kg 577 leh gram 59 manin ganja kg 841 leh gram 98 an man bawk a ni. Crystal Meth hi Police-in kg 35 leh gram 155 an man a, Excise and Narcotics hian nikum khan engemawzat manin kuminah erawh chuan man an la nei lo a ni. Heroin leh methamphetamine hi Asia chhim chhak lam atanga Myanmar ram kaltlanga rawn tawlh luh a ni a, Ganja hi Manipur leh thenawm state dang atanga a ruka rawn tawlh luh niin tunlai hian Mizoram thalaite'n an ching thar leh hle niin dan kengkawhtute chuan an sawi a. Hei bakah hian khuh damdawi, a bikin codeine tel chi bakah Alprozalam, diazepam, nitrazepam leh tramadol te tam tham tak man a ni bawk a. He'ng damdawite hi phalna nei a siamchhuah a ni chungin Mizoramah hian thalaite'n ruihna atan an hmang uar hle a ni.

Police department mite hian kumin January leh September inkar chhung khan heroin kg. 67 leh gram 19 an man a, Excise & Narcotics department hnathawkte chuan kg 37 leh gram 76 an man thung a. Methamphetamine hi Police in kg 454 leh gram 624 manin Excise & Narcotics department mite'n kg 122 leh gram 435 an man bawk a. Ganja hi Police lamin kg. 294 leh gram 765 an man lai-in Excise & Narcotics chuan kg 546 leh gram 335 an man thung a ni, ruihhlo an man zawng zawng hi cheng vaibelchhe 184 leh nuai 44 hu ni-in an chhut a. Heroin bik hi cheng vaibelchhe 20 leh nuai 15 hu a chhutin, crystal meth an man hi cheng vaibelchhe 105 leh nuai 46 zet hu niin an chhut a, methamphetamine an man chu cheng vaibelchhe 59 leh nuai 10 chuang hu niin an chhut a ganja an man hi cheng nuai 14, sing 7 leh sang 3 chuang hu a chhut a ni bawk. Excise & Narcotics department thuneitute erawh chuan an ruihhlo man hlut zawng hi an tarlang ve lo a ni.

Police hian dan kalha heroin tawlh chungchangah thubuai 246 ziaklutin mi 328 an man a, crystal meth kaihhnawihah thubuai 4 ziaklutin mi 3 an man a, methamphetamine tawlhthu a rinhlelh mi 40 manin thubuai 19 an ziaklut a. Ganja chungchangah thubuai 17 ziaklutin mi 20 an man bawk a ni.

Hetih lai hian kumin chhung hian ruihhlo hmansual avanga thi hi Excise & Narcotics department chuan mi 61 an chhinchhiah a, ruihhlo hman avanga thi zinga 53 hi mipa an ni a, 8 chu hmeichhia an ni. Kumina ruihhlo vanga thi 61 zinga mi 34-te hi heroin vanga thi an ni a, mi 27-te chu heroin leh damdawi ruih theih dang tihpawlh avanga thi an ni. Kum 1984 khan Mizoramah ruihhlo hmansual avanga thi pakhat chhinchhiahin hei hi ruihhlo kaihhnawiha thi chhinchhiah a ni a, heroin vanga thi a ni. Hemi atanga chhuta tun thleng hian ruihhlo avanga thi hi mi 1,873 an tling tawh a, an zinga mi 225-te chu hmeichhia an ni. Mizorama ruihhlo vanga thi mi 1,873 zinga a tam ber mi 1,161-te chu tunhma a thalaite'n an hmansual nasat tak, nachhawka chi khap spasmo proxyvon leh parvon spa vanga thi an ni a. Heroin vangin mi 267 an thi tawh a, damdawi chi hrang hrang khawih kawp avanga thi hi mi 445 an awm bawk.

Kum 1990 hma lam kha chuan spasmo proxyvon leh parvon spa avanga nunna chan chhinchhiah a awm lova, heroin leh hroin vanga thi an tam ber a. Kum 2017 hnu lamah he'ng nachhawka damdawi avanga nunna chan hi an awm zui tawh hek lova. A chhan chu sorkarin siamchhuah a khap tak vang ni a sawi a ni.

Mizoram thenawm, km 404 zet a thui ramri a tawmpui Myanmar hi ruihhlo siamchhuahna hmunpui Golden Triangle nena a inhnaih avangin tun hma atang tawhin Mizoram hi ruihhlo tawlhrukna kalkawng kumhlun a ni a. Chuti chung chuan February ni 1, 2021 a Myanmar sipaite'n mipui thlan sorkar paihthla a thuneihna an pawnglak atang khan Mizoram a ruihhlo tawlh luh hi nasa takin a hluar zual a. Hei hi Myanmar sorkara inrelbawlina fel a awm tak loh vang niin dan kengkawhtute chuan an ngai a ni.

<><><>

## CM-NH

Chief Minister Pu Lalduhoma chuan Sairang leh Kawnpui inkar kawng, NHIDCL ten an siam mek a tlawh a, kawngpui chhe zual te chu October ni 9 ral hma neigia hnawh mam hman turin a hrilh.

Pu Lalduhoma hian nimin khan helai kawngpui hi a hmunah a tlawh a. Sairang leh Durlui inkara kawng chhe zual lai hmung nga vela kawng chhe zual chu siam tha turin he lai kawng enkawltu NHIDCL hotute a hrilh a. A chhe zual lai hi awm mah se, siam harsa lutuk khawpa chhia a nih loh thu sawiin hmanruate inlakhawma siam tan tura hmalak mek a nih thu a sawi a. Tun kar Nilaini khi chuan hnawh mam vek tura

thawktute a hrilh chu anni pawhin zawh hman vek a tum tur thu an sawi niin a sawi. He lai kawngpui bik hi Mizoram PWD hnuai a awm a ni lova, NHIDCL enkawl lai a ni a, an mawhphurhna a nih rualin an hnuai thawk leh chhawng Mizo contractor-te mawhphurhna pawh a ni tel niin chief minister chuan a sawi a. Hna an thawk tha lo a nih chuan ban a, midang la mai tur pawha an inhrilh tur thu a sawi a. He lai hi pavement te siam a alkatra hmanga la siam zel tur a nih thu a sawi a ni.

<><><>

#### **MUMBAI FIRE/FOOD POSONING**

Tukina Mumbai Chembur veng a chenna in kangah chhungkaw pakhata mi 7 an thi a, an zingah hian naupang 3 an tel a ni.

In hi chhawng 2-a sang a ni a, chhawng hnuai ber dawr atangin kangmei hi a chhuak tan a, electric current kal sual atanga intan nia hriat a ni.

Maharashtra Chief Minister Eknath Shinde-a chuan kangmei thlenna hmun hi waviin khan tlawhin thi chhungte hnenah zangnadawmna cheng nuai 5 pek an nih tur thu leh hliam tuar 2-te inenawkalna senso chu sorkarin a tum ang tih a sawi a ni.

Hetih lai hian Latur veng a Purnamal Lahoti Govt. Technical College-a zirlai 60 chu thil eisual vangin damdawi inah dah an ni a, an thil ei hi endik turin laboratory-ah thawn a ni.

<><><>

#### **WEST ASIA CRISIS**

Nimina Israel-in Lebanon a beihnaah mi 20 chuang an thi a. Israel sipaite hian a wawi khat nan Lebanon hmar lama Hezbollah leh Hamas-ho tawmna nia hriat, Palestinian refugee camp-ah bomb a thlak a ni.

Boruak a sosan zel avang hian Lebanon mipui sang tel bakah Palestinian refugee-ten sahimna zawngin an tlanchhia a, thuthar thehdarh tute sawi danin, Zirtawpni-a Israel-in beihpui a thlak hnuah Hezbollah hruaitu thi ta, Sayyed Hassan Nasrallah thlaktu tur ni ngaih, Hashem Safieddine-a chu biak pawh theih a ni lova, Beirut chhim lama lei hnuai an pawl hruaitu pawimawh dangte nena an bihrukna, Israel-in indo thlawhna-a an kahnaah a thi niin thuthar theh darhtute chuan an sawi a ni.

Hetih lai hian France President Emmanuel Macron-a'n Israel-in Gaza-a a hman tur ralthuam thawn luh ti tawp tura a ngenna chu Israel Prime Minister, Benjamin Netanyahu-a chuan na taka chhang letin Iran kaihhruai mi nunrawngte, Israel-in a beih letna chu ram pangngai chinte chuan an thlawp tlat tur a ni, a ti.

<><><>